

寧河縣志卷之十

藝文志 凡五

記言記事志體也言而無文行之不遠故詞文旨遠者尚焉上自郊廟朝廷下迄鄉黨閭巷其言之粹然出於正者將以敷陳政治裁量品物宣達性情誠所以載道者也不則惠施五車其道踳駁言有枝葉矣又何文之足尚哉伏惟我

朝典冊兼綜條貫深仁厚澤盈塞天淵而公卿大臣日月獻納嘉謨所在

京畿近邑罔敢不載焉他如碑版詞章衆制鋒起勒功
德以傳後假風雅以攄懷並宜集其精英以存體要
豈僅小技云乎哉觀乎人文以化成天下道在此矣
志藝文

宸翰

康熙三十四年九月二十四日

諭戶部直隸順天保定河間永平四府所屬地方今歲水
潦傷稼三農歉收朕巡幸所至徧加諮訪聞高阜之產
尚有秋成而卑下之田被潦者多計所收穫不能相敵

雖經勘災頒賑不致仳离失所而須辦錢糧若仍行徵收則民力匱乏難以輸將朕心深切不忍著將四府康熙三十五年地丁銀米全與蠲免用示寬恤其霸州雄縣香河寶坻四處皆有水道可以轉輸每處著發米一萬石各差司官一員齎往照彼地時價減值發糶以資民食著行文該撫通行曉諭俾均沾實惠副朕軫念災黎至意爾部卽遵諭行欽此

康熙五十五年十二月二十六日

諭戶部朕御極已來念切民生時勤宵旰凡巡歷所至必

以編氓疾苦備悉諮詢蓋欲比戶之蓋藏恒裕三時之
水旱無虞斯民氣和樂聿成豐亨豫大之休也頃者朕
巡行口外終過三河等州縣暨永平府交界地方見今
歲秋成豐稔米價稱平惟是去年雨水過溢田畝間被
淹沒朕深加軫惜蠲賦平糶轉漕分賑貧民使不致失
所今者雖復有秋然僅足支一歲之用恐來年之輸將
尚多難繼是必再沛恩膏始可大培民力著將順天永
平兩府所屬大興宛平通州三河密雲薊州遵化順義
懷柔昌平寶坻豐潤平谷玉田良鄉涿州武清永清香

河霸州大城文安固安東安房山保定延慶梁城盧龍
遷安樂亭灤州撫寧昌黎山海等州縣所衛康熙五十
五年地丁銀二十六萬四千三百三十六兩零米豆高
糧二萬一千六百四十六石零草九萬四千九百五十
束零俱通行蠲免所有歷年積欠銀九萬三百九十六
兩零米豆高糧一萬六千二百七十五石零草八萬四
千四百七十束零亦併與豁除爾部行文該督嚴飭所
屬實心奉行俾遐村窮谷均沾德意倘有不肖有司借
端朦混私行徵收者察出定行從重治罪爾部卽遵諭

行欽此

雍正二年十月二十三日

諭直隸九府今秋歲登大有惟霸州東安大城武清玉田
寶坻梁城所七州縣所地畝稍被水傷朕卽諭巡撫李
維鈞將倉糧發賑今李維鈞奏請將七州縣所被水村
莊本年錢糧緩至雍正三年麥收後帶徵但念此小民
生全初遂若將今歲錢糧歸於明歲帶徵則新舊之賦
輸納於一年之內物力維艱勢難兼顧夫百姓雖登樂
利猶資惠養有方爾部行文該撫著將霸州等七州縣

所被水村莊雖未成災今年應徵錢糧內或應有蠲免之處詳查定議具題務紓民力以副朕軫念黎元至意

雍正六年十月十四日

諭戶部直隸爲首善之地今歲春麥秋禾俱登豐稔民人樂業朕心深慰但地方有歷年帶徵之錢糧若令閭閻之間新舊並納雖逢豐稔之歲而民力未必寬然有餘因思歷年帶徵之項乃頑戶之所拖欠也明年額徵之項乃衆民之所輸將也若欲使小民共被恩澤惟有將明年之賦預行蠲免則比戶可以均霑查直隸額徵地

丁等項二百四十三萬餘兩本地支銷俸工及兵餉驛站等項應給銀二百零二萬兩其應起運者計四十一萬七千八百九十兩著將雍正七年額徵錢糧內蠲免四十一萬七千八百九十兩爾部可確查分數行文該督通行所屬州縣一體敬謹遵奉以副朕愛養黎元嘉惠畿輔之至意倘官吏等私自多徵朦混中飽或地棍等包攬侵蝕作弊藏奸又或有司奉行不善使百姓不得均霑實惠經朕訪聞必重治其罪並將總督司道等嚴加處分欽此

雍正七年閏七月二十九日

諭聞直隸地方有寄莊寄糧之弊往往地寄此處糧寄他處相隔百餘里或數百里之遠卽如宣化府懷安一縣有人地俱在懷安而寄糧於宣化萬全者有人地俱在宣化萬全而寄糧於懷安者更有現在懷安納糧而寄地於順天府之寶坻豐潤三河相隔五百餘里者在徵糧者則鞭長莫及而寄地者則彼此無關脫漏欺隱之弊勢所不免地方有司實難稽察催徵朕之所聞如此著直隸總督詳細確查若果有此等應作何更正改隸

之法著該督悉心妥議具奏再直省如有似此寄莊寄糧者著該督撫亦詳查酌量定議具奏欽此

乾隆二年四月十八日總理事務王大臣奉

上諭今年春夏以來京師畿輔雨澤稀少而山東地方亦有缺雨之郡縣朕亦屢降諭旨多方籌畫以爲先事之備今思節近小滿甘霖未降麥秋料已失望民心未免惶懼除已經降旨緩徵外著將直隸通省今年應徵地丁錢糧蠲免七十萬兩山東通省今年應徵地丁錢糧蠲免一百萬兩俾民力寬舒民氣愉暢如將來仰蒙

天佑霖雨普施秋成不致歉薄則閭閻霑朕格外之恩亦加惠元元之誼所謂百姓足君孰與不足者嗣後如得雨稽遲有妨農事則應行賑恤等事仍應加意辦理毋使一夫失所該督撫當仰體朕宵旰焦勞惠普黎庶之心督率有司敬謹奉行務使小民均霑實惠并出示通行曉諭知之欽此

乾隆四年三月二十二日內閣奉

上諭朕念切民生時厯宵旰或各省督撫陞見或遇司道各員請訓務以編氓疾苦備悉諮詢惟期海隅蒼生培

固元氣庶臻家給人足之風比年以來畿輔地方屢遇歉收而江南舊年被旱尤甚此皆朕之不德以致

上蒼示警遂使吾民有乏食之虞朕甚恤焉今幸賴

上蒼恩佑各省春雨頗周足資耕種今念三省之民幸有以安其心尚未能復其舊其被災處所旣已蠲賑頻施屢頒諭旨茲當開徵之期在被災者固屬艱難而未被災之地同在一省雖有輕重之分而乏食受困則一用是特頒諭旨將直隸總督所屬今年地丁錢糧蠲免九十萬兩蘇州巡撫所屬今年地丁錢糧蠲免一百萬兩安

徽巡撫所屬今年地丁錢糧蠲免六十萬兩該督撫務將朕旨家喻戶曉俾閭閻均受實惠庶幾和氣致祥以仰答

上天之恩而培民生之本倘有貪官污吏藉端苛索或私行徵收者該督撫不時察叅該部卽遵諭行欽此

乾隆十六年十二月十四日內閣抄出奉

上諭大學士高晉等會勘南北兩運城河據奏酌籌修濬事着依議速行但摺內所稱修濬河隄橋壩各工據各該道屬河工成規約需銀十二萬一千餘兩今請於停

賑之時照興工代賑舊例給價共約估需銀九萬一千餘兩俾小民得以力作餬口等語四處城河在武清寶坻寧河天津青縣滄州諸境內今歲皆值偏災寓賑於工自與小民有益惟是以工代賑向例較之河工成規給價轉少朕思地方既有偏災卽不用其力尚且多方體恤乃因寓賑之工轉致減價給發於理未協卽該地方已經給賑而赴工之人未必卽係領賑之人亦無從區別蓋所謂興工代賑者其工原屬不必興者第爲災黎起見旣受更賑之後因以修舉廢墜俾得藉以餬口

自應循照往例若實係緊要工程亟應興作自又當照原價給與此項城河修濬工程所有土方工價銀兩着照河工成規全行支給以副朕子惠黎元至意其嗣後各省以工代賑之處俱令分別工程緩急照此辦理該地方官務須督率稽查俾工歸實用毋令浮冒濫銷斯可矣該部遵諭速行欽此

乾隆二十八年正月初二日內閣奉

上諭去歲直隸各屬雨水過多其偏災地方已經加恩賑恤並酌籌以工代賑俾窮黎不致失所但時屆春月例

賑將停麥秋尙遠正當青黃不接之際農民口食未免拮据深爲軫念著再加恩將被災較重之霸州保定文安大城永清東安武清寶坻寧河薊州安州新安天津青縣靜海滄州寧晉等十七州縣之極次貧戶口暨被災稍重之大興宛平昌平順義固安涿州新城雄縣香河豐潤玉田灤州昌黎樂亭清苑望都高陽河間任邱交河景州東光南皮鹽山慶雲冀州武邑衡水等二十八州縣之極貧戶口均於停賑之後概予展賑一個月以資接濟並於通倉所存乾隆二十四年以前稔米撥

運十二萬石以克展賑之需該督方觀承其董率屬員實力奉行務使貧民均霑實惠副朕愛養黎元至意該部遵諭速行欽此

乾隆二十八年二月十九日

行在內閣抄出奉

上諭朕恭謁

東陵途次周諮民隱直屬州縣上年秋霖被災較重深堪軫念前已疊降諭旨概行加賑至本年三月但現在農民東作方興麥秋尚遠口食猶恐拮据著加恩將被災六